



Här Fernand Etgen
President vun der Chamber

Lëtzebuerg, de 29. Juni 2022

Här President,

Esou wéi et am Artikel 80 vum Chambersreglement virgesinn ass, géif ech Iech bidden, dës parlamentaresch Fro un d'Madamm Kulturministesch weiderzeleeden.

D'Beeforter Schloss ass eng gutt erhalte mëttelalterlech Buerger mat Renaissance-Wunnegebai a Ställ, Scheieren a Schäpp, déi doduerch eng wichteg touristesch Attraktioun sinn. Den 30. Juli 2021 ass en Deel vun der Baussemauer vum Beeforter Schloss no staarkem Reen agefall. De Kulturministère huet direkt zougesot, dat d'Mauer esou séier wéi méiglech nees opgebaut sollt ginn, no enger Bestands- an Ursaachenanalys.


Haut, bal 1 Joer duerno, ass d'Mauer nach ëmmer net gefléckt.

Den INPA, deemools nach de Service des Sites et Monuments, huet ugangs vum Joer bekannt ginn, dat d'Analysen eng méi komplizéiert Situatioun erginn hunn, déi d'Fléckaarbechten net vereinfachen. Trotzdeem muss ee feststellen, dat den Zoustand vun der Mauer sech net verbessere wäert, wa se weiderhin dem Wieder an dem Reen ausgesat ass. Ausserdeem verdéngt de kulturhistoresche Bijou e besseren Ubléck.

Dofir géif ech gär folgend Fro un d'Madamm Kulturministesch stellen:

- Wéini sollen d'Aarbechten un der Buergermauer, déi dréngend néideg sinn, ulafen?
- Wat sinn déi detailléiert Konklusiounen vun den Analysen, déi vum Denkmalschutzamt maache gelooss gi sinn?
- Wat fir Aarbechte musse genee gemaach ginn, fir d'Mauer ze stabiliséieren an an en normalen Zoustand ze versetzen?
- Wéini sollen d'Aarbechte fäerdeg sinn?
- Wéi héich soll de Käschtepunkt vun den Aarbechte sinn?
- Si provisoersch Aarbechten gemaach ginn, fir dat d'Situatioun sech net nach weider verschlëmmert? Wat ass bis elo schonn gemaach ginn?
- Ass d'Madamm Minister net der Meenung, datt déi definitiv Instandsetzung vun der Mauer dréngend ass?

Här President, ech bieden Iech mäin déifste Respekt unzehuelen.

A handwritten signature in black ink, appearing to read 'Modert', with a stylized flourish at the end.

Octavie Modert

Deputéiert



Äntwert vun der Kulturministesch Sam Tanson op d'parlamentaresch Fro n° 6428 vum 30. Juni 2022 vun der Honorabeler Deputéiert Octavie Modert

Déi baussecht Mauerschuel vun der ënneschter Baussemauer am Gruëf virun der Beeforter mëttelalterlecher Ruin huet sech wéinst dem deelweis schlechten an duerch de ville Reen am Juli 2021 opgeweechten Ënnergrond gesat. Den 30. Juli 2021 huet sech dunn des Mauerschuel vun den anere Mauerdeeler bannendra lassgeléist, ass ageknéckt an duerno ënnert hirem Eegegewicht a sech zesummegefall. Dat sinn d'Konklusiounen vu den Experten.

D'Aarbechten un der Buerghmauer, déi eng Urgence am Sënn vun der Stabilitéit a Sécherheet duergestallt hunn, goufen d'lescht Joer vum INPA a mat externen Ingenieuren zesumme geplangt an Ufanks 2022 ausgefouert. Weider Sanéierungsarbechte vun de Mauerkrone beim Agang sollten d'Touristesaison vun dësem Joer net steieren. Dofir ginn dës Aarbechten an de Neibau vun der baussechter Schuel vun der Buerghmauer mat den entsprecherende Verstärkunge vun de Fundamenter eréischt vun November 2022 un realiséiert.

Am Detail ass nach Folgendes ze maachen : Neimaache vun de Mauerkrone beim Agang vun der Ruin, deelweis Ofbaue vun Deeler bis an 1 m Déift an d'Mauer eran, Stabilisatioun a Verstärkung vun de Fundamenter, Opbau vun der baussechter Mauerschuel a Verbanne mat den ugrënzende Maueren, Neimaache vu Foue bei de betraffene Maueren, Drainage duerch Buerungen aktivéieren. D'Dauer vun dësen Aarbechte gëtt op 8 Méint geschätzt.

De Käschtepunkt vun den Analysen a Stabilisatiounen beleefte sech op ca. 350.000 EUR. D'Käschte vun den Opbauarbechte ginn duerch eng ëffentlech Soumissioun festgeluecht. Si sinn op 1 Millioun EUR geschätzt.

Bis haut goufen all déi Aarbechten duerchgefouert déi verhënnert hunn, datt weider Deeler afalen. Dës Aarbechte waren awer net just provisoresch, ma gehéieren zum Gesamtkonzept, a waren d'Viraussetzung dass dëst Joer d'Buergh an d'Schlass nees fir d'Visiteuren zougänglech sinn. Dobäi goufen déi Deeler demontéiert déi riskéiert hätten erof ze falen an et goufe verschidden Deeler mat Ankerstaangen zesummegehalen.

D'Drénglechkeet war vun Ufank un dem INPA a mäin Uleies. Dofir kann dës Touristesaison och elo normal funktionéieren a soubal se eriwwe ass, geet et mat den Aarbechte virun.

Lëtzebuerg, de 15. Juli 2022.

D'Kulturministesch

(s.) Sam Tanson